



МОНГОЛ УЛС
ХЭНТИЙ АЙМГИЙН ЗАСАГ ДАРГЫН
ЗАХИРАМЖ

2020 оны 05 сарын 29 өдөр

Дугаар А/286

Чингис хот

Халдваргүйтгэл хийх түр журам батлах тухай

Монгол Улсын Засаг захиргаа, нутаг дэвсгэрийн нэгж, түүний удирдлагын тухай хуулийн 29 дүгээр зүйлийн 29.2, 29.1.5-ын "в, г", 29.1.6-ын "б", 30 дугаар зүйлийн 30.1.6, Гамшгаас хамгаалах тухай хуулийн 32 дугаар зүйлийн 32.1.8, Эрүүл мэндийн тухай хуулийн 11 дүгээр зүйлийн 11.1.4 дэх заалтыг тус тус үндэслэн ЗАХИРАМЖЛАХ нь:

1. "Коронавируст халдвар /COVID-19/-ын үед орон нутгийн шалган нэвтрүүлэх хяналтын цэгээр нэвтрэх тээврийн хэрэгсэлд халдваргүйжүүлэлт хийх түр журам"-ыг хавсралтаар баталсугай.

2. Журмыг хэрэгжүүлж ажиллахыг ариутгал халдваргүйтгэл хийх байгууллага, аж ахуй нэгжийн даргад даалгасугай.

3. Захирамжийн хэрэгжилтэд хяналт тавьж ажиллахыг аймгийн Мэргэжлийн хяналтын газрын дарга /Б.Сүнгээ/, Онцгой байдлын газрын дарга /Н.Чанцал/ нарт тус тус даалгасугай.

ЗАСАГ ДАРГА


Н.ГАНБЯМБА

**"Коронавируст халдвар (COVID-19) -ын үед орон
нутгийн шалган нэвтрүүлэх хяналтын цэгээр нэвтрэх
тээврийн хэрэгсэлд халдваргүйжүүлэлт хийх түр журам"**

Нэг. Нийтлэг үндэслэл

1.1. Энэхүү түр журмын зорилго нь шинэ коронавируст халдварын үед орон нутгийн шалган нэвтрүүлэх хяналтын цэгээр нэвтрэх тээврийн хэрэгсэлд халдваргүйжүүлэлт хийхтэй холбогдон үүсэх харилцааг зохицуулахад оршино.

1.2. Халдваргүйжүүлэлтийн үйл ажиллагаанд энэхүү түр журам болон Дэлхийн эрүүл мэндийн байгууллага, Эрүүл мэндийн яам бусад мэргэжлийн байгууллагаас гаргасан зөвлөмж, журам, зааврыг мөрдөнө.

Хоёр. Халдваргүйжүүлэлт хийх үйл ажиллагаа

2.1. Халдвар бүртгэгдсэн газрын шалган нэвтрүүлэх хяналтын цэгээр гарах, орох чиглэлийн тээврийн хэрэгсэл бүрт халдваргүйжүүлэлт хийнэ.

2.2. Халдвар бүртгэгдээгүй газрын шалган нэвтрүүлэх хяналтын цэгээр орох чиглэлд нэвтрэх тээврийн хэрэгсэлд урьдчилан сэргийлэх халдваргүйжүүлэлт хийнэ.

2.3. Тээврийн хэрэгсэлд хийх халдваргүйжүүлэлтийг Аж ахуйн үйл ажиллагааны тусгай зөвшөөрлийн тухай хуулийн 15 дугаар зүйлийн 15.12.8 дахь заалтад заасны дагуу халдваргүйжүүлэх үйлчилгээ эрхлэх тусгай зөвшөөрөл бүхий аж ахуйн нэгж, байгууллага хийж гүйцэтгэнэ.

2.4. Монгол улсын бүртгэлд бүртгэгдсэн, хэрэглэх ашиглах заавар нь баталгаажсан, хэрэглэх хугацаа хүчинтэй, сав, баглаа боодлын бүрэн бүтэн байдал алдагдаагүй, хаяг шошго тодорхой бодисыг халдваргүйжүүлэлтэд ашиглана.

Гурав. Халдваргүйжүүлэлт хийх аж ахуйн нэгж, байгууллагын үүрэг

3.1. Тээврийн хэрэгсэлд халдваргүйжүүлэлт хийхдээ Зоонозын өвчин судлалын үндэсний төвийн ерөнхий захирлын 2020 оны 02 дугаар сарын 21-ний өдрийн А/15 дугаар тушаалаар баталсан "Коронавируст халдварын үед халдваргүйжүүлэлт хийх түр заавар", Халдварт өвчин судлалын үндэсний төвийн ерөнхий захирлын баталсан "Коронавируст халдвараас урьдчилан сэргийлэх халдваргүйжүүлэлт хийх зааварчилгаа" зэрэгт тусгасан халдваргүйтгэлийн бодисыг ашиглан, аргачлалын дагуу хийнэ.

3.2. Тээврийн хэрэгсэлд халдваргүйжүүлэлт хийх ажилтныг хувийн хамгаалах хувцас, хэрэгсэл, халдваргүйтгэлд зайлшгүй шаардлагатай багаж хэрэгслээр бүрэн хангаж, аюулгүй ажиллагааны зааварчилгааг өгсөн байна.

3.3. Тээврийн хэрэгсэлд халдваргүйжүүлэлт хийсэн тухай актыг 2 хувь үйлдэж, жолоочид нэг хувийг өгнө.

3.4. Халдваргүйжүүлэлт хийж буй аж ахуйн нэгж, байгууллага нь халдваргүйтгэлийн бодисын чанар, хадгалалт, хамгаалалт, аюулгүй байдлыг бүрэн хариуцна.

Дөрөв. Тээврийн хэрэгслийн жолоочийн үүрэг

4.1. Тээврийн хэрэгслийг аймаг, нийслэлд нэвтрэх шалган нэвтрүүлэх цэгийн заасан газарт зогсоож, халдваргүйжүүлэлтийг хийлгэнэ.

4.2. Шалган нэвтрүүлэх цэгт ажиллаж байгаа холбогдох байгууллагын ажилтнуудын тавьсан хууль ёсны шаардлагыг биелүүлж, халдваргүйжүүлэлтийн ажилтны зөвлөмж, зааврыг мөрдөнө.

4.3. Халдваргүйжүүлэлт хийлгэсэн тухай актын нэг хувийг авч, шаардлагатай

тохиолдолд дараагийн шалган нэвтрүүлэх цэгт шалгуулна.

4.4. Тээврийн хэрэгслийн гадна, дотор талыг тогтмол цэвэрлэн, хог хаягдлыг уут саванд хийж, суурин газрын хогийн цэгт хаяна.

4.5. Тээврийн хэрэгсэлд халдваргүйжүүлэлт хийсэн тухай актыг хуурамчаар үйлдэх, дахин ашиглахыг хориглоно.

4.6. Жолооч тээврийн хэрэгсэлд гар ариутгах, халдваргүйжүүлэх бодисыг зорчигчид хэрэглэхэд хялбар, хүрэлцэхүйц хэмжээгээр байршуулах.

Тав. Бусад

5.1. Халдваргүйжүүлэлт хийлгээгүй тээврийн хэрэгслийг шалган нэвтрүүлэх цэгээр нэвтрүүлэхийг хориглоно.

5.2. Энэхүү түр журмыг зөрчсөн иргэн, аж ахуйн нэгж, байгууллагад Монгол Улсын холбогдох хууль, тогтоомжид заасны дагуу хариуцлага хүлээлгэнэ.

ТЭЭВРИЙН ХЭРЭГСЭЛД ХАЛДВАРГҮЙЖҮҮЛЭЛТ
ХИЙСЭН АКТ

20 оны ..сарын өдөр цаг

Шалган нэвтрүүлэх товчооны нэр:.....

1. Тээврийн хэрэгслийн улсын дугаар:.....
2. Халдваргүйжүүлэлт хийсэн байгууллагын нэр:.....
3. Халдваргүйжүүлэлт хийсэн арга:

Шүрших Мананцаржуулах Уураар утах Туулах

Халдваргүйжүүлэлт хийсэн бодисын нэр, уусмалын концентраци:.....

.....

Ариутгагчийн нэр...../ / гарын үсэг/ /нэр/